



## Finale Resultate Persverklaring vir Remgro Beperk (Remgro)

### REMGRO SE BELEGGINGSPORTEFEULJE LEWER BEVREDIGENDE RESULTATE GEGEWE DIE HUIDIGE EKONOMIESE KLIMAAT

- **Wesensverdienste per aandeel neem met 1.8% tot 1 513 sent toe**
- **Wesensverdienste per aandeel, uitgesluit opsie hermeting, neem met 7.7% tot 1 467 sent toe**
- **Totale dividend per aandeel vir die jaar neem met 7.5% tot 532 sent toe**
- **Intrinsieke netto batewaarde per aandeel soos op 30 Junie 2018 was R256.97**

Remgro se bankwese- en versekeringsbeleggings asook sy beleggings in RCL Foods en Total het 'n pryswaardige prestasie vir die jaar geëindig 30 Junie 2018 gelewer. Mediclinic het, ten spyte van die verskeie voortgesette uitdagings, op 'n genormaliseerde basis verbeter. Die resultate van die ander verbruikersprodukte- en nywerheidsbeleggings was 'n weerspieëling van die moeilike markomgewing wat hierdie sektore in die gesig gestaar het gegewe die uitdagende Suid-Afrikaanse makro-ekonomiese toestande. Die infrastruktuurbeleggings het, op 'n wesensverdienste vlak, 'n verbetering getoon met goeie groei in sy sleutelbeleggings.

Vir die jaar tot 30 Junie 2018 het wesensverdienste met 4.3%, van R8 221 miljoen tot R8 573 miljoen, toegeneem, terwyl wesensverdienste per aandeel (WVPA) met 1.8%, van 1 485.5 sent tot 1 512.6 sent, toegeneem het. Die verskil in die toename tussen wesensverdienste en WVPA is toeskryfbaar aan die impak van die regte-uitgifte in die vergelykende jaar.

Ingesluit in wesensverdienste vir die jaar onder oorsig is 'n positiewe billike waarde aanpassing van R261 miljoen (2017: R687 miljoen) wat verband hou met die afname in waarde van skuldbriefhouers se omruilopsie van die omruilbare skuldbriewe (opsie hermeting). Met uitsluiting van die opsie hermeting het wesensverdienste met 10.3%, vanaf R7 534 miljoen tot R8 312 miljoen, toegeneem, terwyl WVPA met 7.7%, vanaf 1 361.3 sent tot 1 466.5 sent, toegeneem het. Die toename in wesensverdienste, uitgesluit opsie hermeting, is hoofsaaklik die gevolg van hoër verdienste deur die bank- en versekeringskategorieë, RCL Foods, Total en hoër finansieringsinkomste, wat teengewerk is deur 'n laer bydrae van Mediclinic asook transaksiekostes aangegaan met die Distell eienaarskapsherstrukturering en die Unilever Smere-besigheid verkryging.

Kommentaar op die prestasie van elk van die onderliggende rapporteringskategorieë word in die Redakteur se aantekeninge uiteengesit.

Remgro se intrinsieke netto batewaarde per aandeel het met 2.2%, vanaf R251.48 op 30 Junie 2017 tot R256.97 op 30 Junie 2018 toegeneem. Die sluitingsaandeelprys op 30 Junie 2018 was R204.29 (2017: R213.46), wat 'n diskonto van 20.5% (2017: 15.1%) tot die intrinsieke netto batewaarde verteenwoordig.

Kontant by die kern het met R1 481 miljoen tot R13 704 miljoen op 30 Junie 2018 toegeneem hoofsaaklik te danke aan 'n 5.6% toename in dividende ontvang vanaf R4 276 miljoen tot R4 516 miljoen.

Vir die jaar geëindig 30 Junie 2018, is 'n finale dividend van 328 sent per aandeel verklaar uit inkomstereserwes ten opsigte van beide die gewone aandele sonder pariwaarde en die ongenoteerde B-gewone aandele sonder pariwaarde. Hierdie, tesame met die tussendividend van 204 sent per aandeel, bedra 'n totale dividend van 532 sent per aandeel, wat 'n 7.5% toename verteenwoordig teenoor die totale dividend van 495 sent per aandeel verklaar vir die jaar geëindig 30 Junie 2017.

Jannie Durand, hoofuitvoerende beampte van Remgro, sluit af: "Ons bly terdeë bewus van die verslegtende Suid-Afrikaanse ekonomiese toestande en ons sal voortgaan om die Groep se bestaande beleggings te ondersteun sowel as na lewensvatbare beleggingsgeleenthede te kyk."

---

<b>Kontak:</b>	Remgro Beperk Jannie Durand (HUB) (021) 888-3253
<b>Uitgereik en versprei deur:</b>	Keyter Rech Investor Solutions Marlize Keyter (083 701 2021)
<b>Uitreikingsdatum:</b>	19 September 2018
<b>JSE kode:</b>	REM
<b>Webwerf:</b>	<a href="http://www.remgro.com">www.remgro.com</a>

---

## **Redakteur se aantekeninge**

### ***Bankwese***

Die wesensverdiensbydrae van die bankafdeling het R3 525 miljoen (2017: R3 163 miljoen) bedra, wat 'n toename van 11.4% verteenwoordig. FirstRand en RMH het wesensverdiensgroei van onderskeidelik 11.6% en 11.4% gerapporteer. Op 'n genormaliseerde basis, wat sekere nie-bedryfs- en rekeningkundige afwykings uitsluit, en 'n beter weerspieëling van onderliggende prestasies is, het beide FirstRand en RMH verdiensgroei van 7.9% gerapporteer. Hierdie toenames was hoofsaaklik as gevolg van groei in beide netto rente-inkomste, ondersteun deur goeie groei in voorskotte en deposito's, en nie-rente-inkomste weens 'n stewige groei in fooi- en kommissie-inkomste. Hierdie groei in verdienste is deels teengewerk deur 'n toename in nie-presterende lenings weens die moeilike makro-ekonomiese omgewing, wat tot 'n toename in kredietwaardedalingskoste gelei het.

### ***Gesondheidsorg***

Mediclinic se bydrae tot Remgro se wesensverdiens het R1 556 miljoen (2017: R1 875 miljoen) bedra wat 'n afname van 17.0% verteenwoordig. Daar moet op gelet word dat die handelsmerk van alle Al Noor-fasiliteite na Mediclinic omgeskakel is en gevolglik sluit Mediclinic se bydrae vir die jaar onder oorsig 'n versnelde amortisasiekoste van R171 miljoen in ten opsigte van die Al Noor-handelsnaam. Mediclinic se bydrae sluit ook 'n onderkenningkoste van R114 miljoen in ten opsigte van ongeamortiseerde finansieringsuitgawes wat met die herfinansiering van Hirslanden se skuld verband hou. Met uitsluiting van die effek van die versnelde amortisasie en onderkenning van ongeamortiseerde finansieringsuitgawes, sou Mediclinic se bydrae tot Remgro se wesensverdiens met 1.8%, vanaf R1 875 miljoen tot R1 841 miljoen, afgeneem het. Die versterking van die rand teenoor die Switserse frank, die Britse pond en die Verenigde Arabiese Emirate se dirham het ook 'n negatiewe uitwerking op Mediclinic se bydrae gehad. In Britse pondterme het Mediclinic se bydrae, met uitsluiting van versnelde amortisasie en die onderkenning van ongeamortiseerde

finansieringsuitgawes, met 4.9% toegeneem, hoofsaaklik weens 'n sterker vertoning deur die Suider-Afrikaanse en Midde-Oosterse bedryfsafdelings, wat teengewerk is deur 'n laer verdienste deur Hirslanden, en 'n afname in die geëkwiteerde verdienste van Spire. Hirslanden se resultate is beïnvloed deur 'n gedempte mark, die voortdurende veranderinge in versekeringsmengsel en die steeds ontvouende regulatoriese omgewing, terwyl Spire se bydrae tot Mediclinic se resultate 'n voorsiening van £9 miljoen insluit, wat verband hou met die maandelike skikkingskoste van 'n siviele geding met 'n konsultant wat vroeër praktiserende voorregte by Spire geniet het, asook 'n koste wat verband hou met die besluit om die verskaffing van radioterapeutiese dienste by Spire se spesialiskankersorgsentrum in Baddow (Essex) te beëindig.

### **Verbruikersprodukte**

Die bydrae van verbruikersprodukte tot Remgro se wesensverdiensle het R1 605 miljoen (2017: R1 354 miljoen) bedra, wat 'n toename van 18.5% verteenwoordig.

RCL Foods se bydrae tot Remgro se wesensverdiensle het met 52.6% tot R647 miljoen (2017: R424 miljoen) toegeneem. Die toename is hoofsaaklik danksy beter resultate in die hoenderbesigheidseenheid, sterk volume groei in die slaaisous-, troeteldiervoedsel- en pasteikategorieë, laer finansieringskoste en 'n belastingkrediet van R64 miljoen wat verband hou met 'n energiedoeltreffendheidstoelae in die suikerbesigheidseenheid. Die verbetering in die hoenderbesigheidseenheid was die gevolg van 'n hersiene besigheidsmodel, laer voerpryse en beter realisasies. Die toename is deur die effek van listeriose in die besigheidseenheid, wat 'n geskatte negatiewe impak van R158 miljoen gehad het, gedemp. Die suikerbesigheid het uitdagende markomstandighede ervaar weens laer internasionale pryse, 'n relatiewe sterk geldeenheid en 'n aansienlike volume gestorte invoerprodukte.

Unilever se bydrae tot Remgro se wesensverdiensle het met 11.1% tot R499 miljoen (2017: R449 miljoen) toegeneem. Hierdie toename was hoofsaaklik te danke aan 'n verbetering in bruto marges as gevolg van beter bestedingsbeheer.

Distell se bydrae tot wesensverdiensle, wat die belegging in Capevin Holdings insluit, het R459 miljoen (2017: R481 miljoen) bedra. Distell se resultate vir die jaar onder oorsig is negatief beïnvloed deur eenmalige verliese en afskrywings ten bedrae van R78 miljoen (2017: R22 miljoen) by sy geassosieerde Tanzania Distilleries Beperk, na 'n *sachet*-verbod en aksynsdispuut. Die vergelykende jaar het die terugskryf van 'n voorsiening vir rente betaalbaar ten bedrae van R42 miljoen, wat gemaak is ten opsigte van 'n uitgebreide aksynsdispuut, ingesluit. Distell het wesensverdiensle groei van 5.2%, aangepas vir buitelandse wisselkoersbewegings, afliggings- en groep herstruktureringkoste, sowel as die voorgenoemde eenmalige items, gerapporteer. Dit was hoofsaaklik gedryf deur 'n 10.4% toename in omset, wat behaal is oor alle streke en kategorieë.

### **Versekering**

RMI Holdings se bydrae tot wesensverdiensle het met 18.0% tot R1 228 miljoen (2017: R1 041 miljoen) toegeneem. Op 'n genormaliseerde basis het RMI Holdings 'n toename van 14.8% in verdienste gerapporteer, hoofsaaklik danksy die vertonings van Discovery (op met 16.2%), OUTsurance (op met 11.5%) en die nuutverkrygte Hastings, deels teengewerk deur die hoër befondsingskoste wat met die Hastings-verkryging gepaardgaan en 'n laer bydrae deur MMI (af met 12.4%). Die sterk vertoning deur Discovery is deur beide gevestigde en opkomende besighede gedryf, terwyl OUTsurance se resultate deur gunstige eisomstandighede by al sy hoofbedrywighede beïnvloed is. MMI se resultate is negatief deur die voortgesette uitdagende makro-ekonomiese omgewing, sowel as bedryfstekortkominge in die Momentum en Metropolitan kleinhandel-afdelings, geraak.

## ***Nywerheid***

Total se bydrae tot Remgro se wesensverdienste het R501 miljoen (2017: R224 miljoen) bedra. Ingesluit in die bydrae tot wesensverdienste vir die jaar onder oorsig is gunstige voorraadherwaardasies ten bedrae van R216 miljoen (2017: ongunstige voorraadherwaardasies van R82 miljoen). Hierdie herwaardasies is die gevolg van die onbestendigheid in die Brent ru-olieprys en die randwisselkoers. Uitgesluit dié herwaardasies, het die bydrae met 6.9%, vanaf R306 miljoen tot R285 miljoen, afgeneem.

Remgro se deel van KTH se resultate het R55 miljoen (2017: R34 miljoen) bedra. Die toename is hoofsaaklik weens laer finansieringskoste as gevolg van die terugbetaling van skuld nadat die belegging in Exxaro Resources Beperk verkoop is.

Air Products en Wispeco se bydrae tot wesensverdienste het onderskeidelik R289 miljoen en R122 miljoen bedra (2017: R298 miljoen en R169 miljoen), terwyl PGSI R4 miljoen tot Remgro se wesensverdienste bygedra het (2017: R25 miljoen).

## ***Infrastruktuur***

Grindrod se bydrae tot Remgro se wesensverdienste het 'n verlies van R46 miljoen (2017: 'n verlies van R48 miljoen) bedra, hoofsaaklik as gevolg van voorraadwaardedalings in die spoorwegmonteerbesigheid weens die sluiting van dié besigheidseenheid. Die afname is deels teengewerk deur beter resultate van kernbesighede hoofsaaklik as gevolg van verhoogde kommoditeitsaanvraag en stewiger droëvrag-verskepingstariewe.

Vir die jaar onder oorsig het die CIV-groep R48 miljoen tot wesensverdienste bygedra (2017: R110 miljoen). Hierdie afname is hoofsaaklik te wyte aan hoër finansieringskoste en waardevermindering as gevolg van verhoogde infrastruktuurbesteding. Ondanks die afname in verdienste het die CIV-groep se maandelikse annuïteitsinkomste tot R138 miljoen (2017: R115 miljoen) toegeneem.

Remgro se deel van SEACOM se wins het R15 miljoen (2017: 'n verlies van R33 miljoen) bedra. Hierdie toename is hoofsaaklik te danke aan verbeterde resultate in Suid-Afrika en Kenia, sowel as 'n eenmalige realisasie van uitgestelde inkomste wat verband hou met die vroeë beëindiging van langtermynkontrakte.

## ***Media en sport***

Media en sport bestaan hoofsaaklik uit die belange in eMedia Investments en verskeie sportbelange, waaronder die belange in rugby-franchises, sowel as die Stellenbosch Academy of Sport.

eMedia Investments se bydrae tot Remgro se wesensverdienste het tot R1 miljoen (2017: R49 miljoen) afgeneem. Die afname is hoofsaaklik te wyte aan 'n wesentlike afname in lisensie-inkomste, weens 'n heronderhandelde DStv-ooreenkoms, en die voortgesette belegging in die Openview platform.

## ***Ander beleggings***

Die bydrae van ander beleggings tot wesensverdienste het R66 miljoen (2017: R70 miljoen) bedra, waarvan Business Partners se bydrae R65 miljoen (2017: R54 miljoen) was.

## ***Sentrale tesourie en ander netto korporatiewe koste***

Finansieringsinkomste het R524 miljoen (2017: R349 miljoen) bedra. Hierdie toename is hoofsaaklik die gevolg van hoër gemiddelde kontantbalanse as gevolg van Remgro se regte-uitgifte in die vergelykende jaar. Finansieringskoste het R891 miljoen (2017: R903 miljoen) bedra. Die positiewe billike waarde aanpassing van

R261 miljoen (2017: R687 miljoen) hou verband met die daling in waarde van die omruilopsie van die omruilbare skuldbriewe. Ander netto korporatiewe koste het R282 miljoen (2017: R143 miljoen) bedra. Die toename in ander netto korporatiewe koste is hoofsaaklik toeskryfbaar aan transaksiekoste van R109 miljoen wat aangegaan is met die eienaarskapsherstrukturering van Distell en die verkryging van die Unilever Smerebesigheid.